



**Bewegung LindenGrün
Allschwil**

„Singt 2, 3, 10, 100 Lindenpark-Lieder!“

- Nr. 1 Die Birke'n isch jetz gstorbe
- Nr. 2 Dä Park isch di Park, dä Park isch mi Park
- Nr. 3 This is my Pärkli in the Sun
- Nr. 4 Avanti popolo - Mir wänn jetz kämpfe
- Nr. 5 Gang rüef de Grüene, gang rüef de Roote
- Nr. 6 Zwüsche Schönebuech und Basel
- Nr. 7 Dä Lindepark muess Gras ha
- Nr. 8 Ich gang am Morge ins Lindepärkli
- Nr. 9 This is our Pärkli, our Lindepärkli
- Nr. 10 Lindepärkli, bisch zwar chlii
- Nr. 11 Morge früeh, wenn d'Sunne lacht
- Nr. 12 Niene geit's so schön u luschtig
- Nr. 13 Am Brunne hinderem Kiosk



Lindenpark-Lied Nr. 1: Die gefällte Birke

(Nach der Melodie 'Dr Ferdinand isch gstorbe' wehmütig zu singen)

1.

Die Birke n' isch jetz gstorbe, oje oje oje,
Die Birke n' isch jetz gstorbe, me schmöckt se niene meh.
Si, wo so vill het gworbe um Schmätzgi im Quartier,
Die Birke isch jetz gstorbe, das arme Tier.

2.

Dr Stamm lit no am Bode, ganz ohne Chrono draa,
dr Stamm lit no am Bode, grad wie n'e tote Maa.
Wär will, dä cha druf pfuuse und dräumt e schöne Draum,
Dr Stamm lit do am Bode, e dote Baum!

3.

Si säge n' es sig nötig, si heig kei Platz me gha,
Si säge n' es sig nötig. „Me macht do keis Trara!“
Är sig 'ne halt im Wäg gsi, dä schöni wissi Stamm,
Die Birke isch jetz gstorbe, so isch s Programm!

4.

Me seit dr Baum sig chrank gsi, und heig drum müese go,
Me seit dr Baum sig chrank gsi. „Die Gfohr cha me nit loo!“
E n'Ascht hätt chönne falle – öpprem uff e Grind.
Si säge n'är sig chrank gsi. „Verzell's em Wind! ...“

5.

Si wänn d'Urbanisierig, e Baum zellt do nit vill,
Si wänn d'Urbanisierig. Jetz isch's uf eimoll still.
4 Amsle n' und 10 Finke, di sinn jetz heimetlos,
Dä Baum het müese wiche, für d'Baslerstross.



Lindenpark-Lied Nr. 2: „Dä Park isch doo für di und mi!“

(Nach der Melodie 'This land is your land, this land is my land' zu singen)

1.

Dä Park isch dii Park, dä Park isch mii Park!
Mir wänn en grünen ha! Do simmer ganz stark!
Die alte Linde gänn chüele Schatte.
Dä Park isch doo für di und mi!

2.

D'Familie Minder het sibe Chinder.
Si hänn kei Garte, und wänn nit warte
bis si im Lotto emoll viel gwünne.
Si bruche'n Uslauf hüt und jetz!

3.
D'Frau Meier-Bründli dräit mit em Hündli
so gege n'Obe dört gärn äs Ründli.
Si fröit sich über d'Lindeblüete.
Dä Park isch doo für di und mi!

4.
Dr Boris Ginšdý, au nümm dr Jüngschi,
got Brot go boschte bim Sutt'r (im Oschte),
bim Coop (im Weschte) isch s'Bier am beschte.
Und zum Verschnuufe got är in Park.

5.
Är stellt si Chratte an Baum in Schatte
und schläckt es Glacé – d'Füess uff dr Matte.
Jetzt chunnt si Kumpel, dr Dr. Humbel,
und hockt uff's Bänkli näbedra.

6.
Mir wänn is wehre, das Pärkli ehre.
Mir wänn nit müese uff s'Land go chere.
Mir bruche s'Pärkli, mit Bäum und Grüenzüg.
An 'Urban Square' wänn mir nit haa! - *No, thanks!*

7.
Dä Park isch dii Park, dä Park isch mii Park!
Mir müen en rette, das macht uns sackstark!
Är isch für alli e grüeni Oase!
Dä Park isch doo für di und mi! – *"Yeah!"*



Lindenpark-Lied Nr. 3

(Nach der Melodie von 'This is my Island in the Sun' zu singen)

1.
This is my island in the sun,
wo dr Vatter gärn spilt mit Tocht'r und Sohn.
E grüeni Oase im Beton-gwüehl,
das Pärkli git uns e Heimetgefühl.

2.

Oh Lindepärkli in Neuallschwil,
di wämmer bhalte, es choscht nit vil.
E schattigi Oase ame heisse n'Ort –
es söll so blibe wie jetz! Sofort!

3.
Wenn d'Chinder spile und gumpe ganz höch,
und d'Eltere sitze im gmüetlige Gspröch,
denn isch's dr Fride für villi Lüt.
Si hänn dr Plausch und e gueti Zit.

4.
Oh Lindepärkli in Neuallschwil,
di wämmer bhalte, es choscht nit vil.
E schattigi Oase ame heisse n'Ort –
es söll so blibe wie jetz! Sofort!



Lindenpark-Lied Nr. 4: 'Avanti popolo!'

Nach dieser bekannten Melodie zügig zu singen:

*Avanti popolo! Alla riscossa!
Bandiera rossa, bandiera rossa.
Avanti popolo! Alla riscossa:
Bandiera rossa trionferà.*

1.
Avanti, popolo! Mir wänn jetz kämpfe!
Für's Lindepärkli, für's Lindepärkli.
Die Bürgerliche, die wänn uns dämpfe –.
Das Lindepärkli, das blibt uns grün!

Mergel-Bode, das will d'SVP,
Mergel-Bode will au d'CVP.
Mergel-Bode – weisch wie's tuet am Chnöi?
Dr Lindenpark isch guet so, är muess nit nöi!

2.
Avanti, popolo! Mir müen jetz schreye,
Für's Lindepärkli, für's Lindepärkli.
D'Allschwiler Obrigkeit will ganz e nöie
und ganz modärne - urbane Blatz.

Mergel-Bode, das will d'FDP,
Mergel-Bode will au d'GLP.
Mergel-Bode – weisch wie's tuet am Chnöi?
Dr Lindenpark isch guet so, är muess nit nöi!

3.

**Was sait denn d'SP, die linggi SP?
Au die wänns 'urban', au die wänns 'urban'!
Und au die Grüene, die lingge Grüene?
Was isch denn numme mit de Grüene los?!?**

Mergel-Bode, das will niemer me!
Mergel-Bode duet bim Falle weh!
Mergel-Bode – weisch wie's tuet am Chnöi?
Dr Lindepark isch guet so, är muess nit nöi!

4.

**Avanti popolo! Mit bunte Fahne
für's Lindepärkli, für's Lindepärkli!
Wenn mir nur zämmestöhn, bringe mer's ane.
Das Lindepärkli, das blibt uns grün!**



Lindenpark-Lied Nr. 5: „Gang rüef de Grüene...“

(Nach der Melodie „Gang rüef de Bruune, gang rüef de Gääle“ behäbig zu singen)

Gang rüef de Grüene, gang rüef de Roote:
si sölle d'Zuekunft uns nit verbroote.
Gang rüef de Roote, gang rüef de Grüene –
si sölle zämme ins Pärkli choo!

Gang rüef de Gschnieglete, gang rüef de Gstrieglete!
Rüef de Vergammlete, und au de Büüglete!
Gang rüef de Pützlete, gang rüef de Brätzlete –
Si sölle zämme ins Pärkli cho!

Senneleduiahoa, senneleduiaho,
Senneleduiahoa, senneleduiaho.
Senneleduiahoa, senneleduiaho.
Senneleduiaduiahoo!

D'Bewegig LindeGrüen, das isch kei Schwätz-Klupp!
S'sinn Dame n' und Herre, wo sich wänn wehre.
D'Bewegig LindeGrüen hett villi Farbe:
Vo grün bis lila über gää und rot.

Me het ghört säge – uff Busch-Drummel-Wäge -
sogar d'Frau Nüssli sig nit drgäge,
dass alles grün blibt im Lindepärkli.
Wär hätt das dänkt eso? – Do simmer froh!

Senneleduiahoa, senneleduiaho,
Senneleduiahoa, senneleduiaho.

Senneleduiahoa, senneleduiaho.
Senneleduiaduiahoo!



Lindenpark-Lied Nr. 6 „Zwüsche Schönebuech und Basel“

(Noch dr Melodii vom Baselbieter Lied I a n g s a m singe: „Vo Schönebuech bis Ammel“)

Zwüsche Schönebuech und Basel,
zwüsche Morgartering und Poscht,
lit in Neuallschwil äs Pärkli,
wo uns alli bald vill choscht!
Das Pärkli isch nit städtisch,
nit 'örben' und nit 'hipp'.

Doch villi sitze gärn dört drin,
das isch kei gheime Tipp! *Juhee!*
Doch villi sitze gärn dört drin,
das isch kei gheime Tipp.

Die LindeGrün-Bewegig
isch chli und doch so stark.
Mir wänn nit no-meh Hitze-Stau,
mir wänn e chüele Park.
Mit Fantasie und Stärki
und mit vill Gstaltigluscht,
vertribe mir dr Mergelwahn;
uff Schei hänn mir kei Luscht, *juhee!*
Dä Mergelbode wämmer nit! –
Mi Riim uff Luscht? - heisst 'Fruscht!'

Doch d'Wirtschaft gseht das anderscht,
die wänn e städtische Blatz!
S'Brestiisch vom Dorf sig s'Wichtigscht,
Nostalgie sig hütt für d'Chatz.
Die bruuche nit es Pärkli,
die bruuche - 'Room for 'Events',
für Jungi und für 'Ku-uli' (cool). –
Für alli andre chlemmt's. – *Oje!*
Dä Platz wird bruucht für d'Spaskultur.
Für alli andre chlemmt's!

Sanfte Zugabe:

Me seit vom Ueli Käller
und red't em öppe noh:
Är well nit numme luege;
es müess au öppis goh!
Und duesch en öppe froge:
"Willsch du für's Rächt* istoh?"

- mit Chopf + Hand + Härz + Muul,
- (au mit de Füess und gar nit fuul),
- mit Witz und vill Beharrlichkeit,
- mit Aschtand und mit Menschlichkeit –
- denn seit dr Ueli: "S'isch mer rächt:
Für das bin ich jo doo!" **Juhee!**
- Denn seit dr Ueli: "S'isch mer rächt:
Für all das bi-i-ni doo!"

Dr Ueli luegt, dass gluegt wird! - Und mir sinn jo au no doo....!

*** „s'Rächt“ = Soziale Gerechtigkeit !**



Lindenpark-Lied Nr. 7: „Dr Lindepark muess Gras haa“

(Nach der Melodie "S'Ramseyers wei go grase" hüpfend und akzelerierend zu singen)

Der Lindepark muess Gra-a-a-as haa
 Der Lindepark muess Gra-a-a-as haa,
 Der Lindepark muess Gra-as haa –
 und Blueme näbäädraa!

Mir bruche Bänk mit Lä-ä-ä-ähne,
 Mir bruche Bänk mit Lä-ä-ä-ähne,
 Mir bruche Bänk mit Lä-ähne –
 für dr Rugge, wunderbar!

Es brucht es WC, da-a-as isch klar,
 Es brucht es WC, da-a-as isch klar
 Es brucht es WC, das isch klar –
 und zwar mit Unterhalt!

Fidiri fidira fidiralalalala.....

Mir wänn do kei Entso-o-orgigs-Stell,
 Mir wänn do kei Entso-o-orgigs-Stell,
 Mir wänn do kei Entsorgigs-Stell!
 Do isch dr falschi Ort!

Dr Erholigsruum für d'Me-e-e-ensche,
 Dr Erholigsruum für d'Me-e-e-ensche,
 Dr Erholigsruum für d'Me-ensche -
 isch doch kei Apfall-Blatz!

Altglas, Bapir und Bü-ü-ü-üchse,
 Altglas, Bapir und Bü-ü-ü-üchse,
 Altglas, Bapir und Bü-üchse -
 söll dä entsorge, wo 's verkauft! **(Konzernverantwortungsinitiative!)**

Dängg emoll!

Für d'Entsorgig vo Apfall, Altglas und Konsärvebüxe darf me doch nit dr Bevölkerig mehrere Quadratmeter vo ihrem Erholigsruum ewäggnen!

Das isch übergriffig! Die Sammelstell, mit em ganze Lärm und Dräck und Gschtank, ghört vor e Coop odr vor d Migros! Sicher nit in dr Park!



Lindenpark-Lied Nr. 8: „Ich gang am Morge...“

(Nach der Melodie von 'Bella ciao', versione tradizionale' I a n g s a m zu singen)

I gang am Morge ins Lindepärkli,
oh bella ciao, bella ciao, bella ciao ciao ciao!
Ich gang am Morge ins Lindepärkli,
und chauf mer vorhär no n es Broot.

Ich sitz uff's Bänkli und iss mis Brötli,
oh bella ciao, bella ciao, bella ciao ciao ciao!
Ich sitz uff's Bänkli und iss mis Brötli,
bevor dr Arbeitsdaag afoot.

Und wenn i am säxi denn wider hei-chumm,
oh bella ciao, bella ciao, bella ciao ciao ciao!
Und wenn i am säxi denn wider hei-chumm,
begrüesst mi dörte s'Oberoot.



Lindenpark-Lied Nr. 9 (Fragment): “This is our Pärkli...”

(Nach der Melodie 'You are my sunshine' liebevoll zu singen)

This is our Pärkli, our Lindepärkli,
es macht mi zfride, when life is grey.
Du weisch's vilicht nit, how much we need it.
Please don't take this Pärkli away!

Wenn ich am Morge scho gang go boschte,
bim Coop im Weschte, bim Sutter im Oschte,
denn sitz i nochhär, zum mi erhole
es Viertelstündli im fründliche Park.

This is our Pärkli, our Lindepärkli,
es macht mi zfride, when life is grey.

Du weisch's vilicht nit, how much we need it.
Please don't take this Pärkli away!



Lindenpark-Lied Nr. 10 (Fragment): 'Lindepärkli, bisch zwar chli...'

(Nach der Melodie 'Schwiizerländli, bisch nu chli' zu singen.)

Lindepärkli, bisch zwar chli,
aber schöner chönntsch nit si!
Gang in d'Wält, sowiit de witt:
Schön'ri Pärkli findsch du nit.
Trallalallala, trallalallala.
Schön'ri Pärkli findsch du nit.



Lindenpark-Lied Nr. 11 (Fragment): 'Morge früh, wenn d'Sunne lacht'

(Nach der Melodie 'Morge früeh, wenn d'Sunne lacht' fröhlich zu singen)

Morge-e früeh wenn d'Sunne lacht,
und si alles luschtig macht,
gohn'i gärn ins Pärkli use,
loo mer's ob em Dräck nicht gruuse.
Mit dene Chinder uff de Böim
fühl i mi deheim.
Ho-o, ho-o, hodulidu, hodulidu, hodulidu,
Ho-o, ho-o, hodulidu, dulidu duliduu.



Lindenpark-Lied Nr. 12 (Fragment):

(Nach der Melodie 'Niene geit's so schön u luschtig' lüpfig zu singen)

Niene geit's so schön u luschtig wie bi üüs im Lindepark.
Da git's allergattig Ruschtig: hm hmm hm hmm....
→ Find du emoll e Riim uff Park, wo besser isch als 'Quark' oder 'sackstark'!

I fang nomoll a:

Niene geit's so schön u luschtig wie bi uns in Neuallschwil.
Do git's allergattig Ruschtig: Dr Lindepark isch hüt mis Zil.

Judihuiaho, didulihuiaho, judihuiaho didulihuiaho.
Judihuiaho, didulihuiaho, judihuiaho didulioo!

Dichten Sie doch selber weiter....



Lindenpark-Lied Nr. 13: „Am Brunne hinderem Kiosk“

(Nach der Melodie von „Am Brunne vor dem Tore“ schwermütig zu singen)

Am Brunne hinderem Kiosk
dört stoht e Lindebaum.
E Frau sitzt uffem Bänkli
und dräumt e süesse Draum.
Am andre Änd vom Pärkli
dört goht's ganz anderscht zue:
Drei Schreihäls uff dr Rutschbahn –
die wüsse nüt vo Rueh.

Vier Fraue mit Sprützchanne,
die laufe hin und här.
Mit Wasserschluuch und Chessel,
bis obe gfüllt und schwär.
So giesse si die Hecke
wo rund ums Pärkli stoht.
Si giesse und si wässere,
bis dief ins Oberoot.

Dä Lindepark isch wärtvoll,
verdient's, dass me ne pflägt.
Drumm wänn mir das verhindre,
dass öpper d'Bäum umsägt!
Die Linde und au d'Föhre,
wänn läbe, so wie du!
Sin d'Heimet vo vill Wäse:
„Graggraa, zizzzii, gugguu...“



Rosemarie Imhof
Frühling und Sommer 2020